

## NAQQIUT

Saqqummiussissut 16. marts 2017-imeersoq taarserpaa  
(Inatsisip qulequtaata iluarsineqarnera)

**Uunga siunnersuut: Inatsisartut Inatsisaat nr. xx ulloq xx xx 2017-meersoq imigassamik aalakoornartulinnik nioqquteqartarneq sassaallertarnerlu pillugit Inatsisartut inatsisaata allanngortinnissaa pillugu.**

(Imigassanik kimittuunik kimikitsunillu aalakoornartortalinnik nioqquteqartarnerup sivitsorneqarnissaa)

**Saqqummiussissut:**

(Inatsisartunut ilaasortat Randi Vestergaard Evaldsen aamma Justus Hansen, Demokraatit)

### **Siullermeenera**

Inatsisartut isumaqatigiillutik 2012-mi ukiakkut ataatsimiinnermi Naalakkersuisut peqqaat imigassanik kimittuunik kimikittunillu nioqquteqartarneq sivitsussagaat tallimannngornikkut arfininngornikkullu nal. 21.00-p tungaanut pisartussanngorlugu.

Qaammatit arlalialunnguit ingerlareersut Inatsisartunut qinersisoqarpoq taavalu qinersereernerup kingorna Naalakkersuisut aalajangiiffigisassatut siunnersuut eqqarsaatigalugu Inatsisartut aalajangernerannit qilersorsimajunnaarput. Inatsisartunili partiit tamarluinnarmik aalajangiiffigisassatut siunnersuummut aalajangeeqataanikummata, pissusissamisoorumik isigineqarpoq Inatsisartut aalajangingaata atortussanngortinneqarnissaa.

2016-mili ukiakkut ataatsimiinnermi, Naalakkersuisut aatsaat inatsisissatut siunnersuummik saqqummiussaarpup (EM2016/122) tassani ammasarfiit sivitsornissaannut Inatsisartut aalajangeriigaat ilaannakoortumik taamaallaat malinneqarpoq. Siunnersuulli allannguutissanik allanik arlaqartunik aamma imaqarpoq ilaalluni imigassamik aalakoornartulinnik nioqquteqartarneq sassaallertarnerlu pillugit killilersuutaareersut ilaannik sakkortunerulersitsinerit. Tamakku tamakkiisumik taparserneqanngitsoorput taamaattumik Naalakkersuisut inatsisissatut siunnersuusiartik tunuartippaat.

Nioqquteqartarnerup sivitsorneqarnissaa pillugu Inatsisartut tamarmiusut isumaqatigiillutik aalajangeranniit ukiut sisamat sinnerlugit ingerlariillartullu aalajangerneq taamaasilluni suli atortussannagortinneqanngilaq.

Matuma inatsisissatut siunnersuutip tamanna aaqqeriariarpaa, aalajangerneq ataqqillugu, Inatsisartut tamarmiullutik tunuliquataaffigisaat.

Agguaqatigiisillugu Kalaallit Nunaanni imigassamik atuineq ukiuni arlaqalersuni appariartorsimavoq maannakkullu assersuutigalugu Danmarkimut naleqqiullugu appasinnerulluni. Taamaakkaluartorli imigassamik atueriaaseq suli ajornartorsiuutigaarput, imertoqartarmat aalakoosujussuarusulluni: Amerlavallaat killeqanngitsumik imertarput, imigassartuleraangamik.

Ajornanngippat angusariaqarput imigassap inuulluarniutitut atornerqartalernissaa, ulluni naliginnarni imertakkatut nuannattoqarneranilu, kisianni killilimmik. Inuulluarniutaassaaq pissusissamisoortumik akisussaassusilimmillu atornerqartartoq, tassa killilimmik.

Imigassamut politikkimut tunngatillugu suliniuteqarnermi tamakku isiginiarneqartariaqarput.

Killilersuinerilli atuuttut arlallit aalakuupallanniarluni imertarnermut sunniuteqartut imatut oqaatigineqarsinnaanngillat, ilaannilu apeqquataavoq, killormut sunniuteqaannartannginnersut.

Nioqquteqarsinnaanerup nalaani killilersuinerit atuuttut annertoorsuarmik pisiortornissamut kajumissaataapput, tamatumalu aqunnissaa ajornaatsuinnaanngilaq. Puiaasat eqqunneqareeraangata usserrissannut usserrartoq takkuttarpoq - aamma puiaasat kingusinnerusukkat imigassatut eqqarsaatigisat ilanngullugit. Killilersuinerit taamaasilluni pissutaataasarput aalakuupallanniarluni imernissamut, siunertaq uniorlugu.

Neriutigaarput manna siunnersuut iluaqutaajumaartoq imigassamik atuisarnerup pissusissamisoornerulernissaanut imipallattarnerullu millisinnissaanut, ataatsimut katillugu imigassaq imerneqartartoq annerusumik allisinnikkaluarlugu. Maannamut misilittakkat, maani Sverigemilu ersersippaasippaat, ammasarfiit sivitsorneri pissutaallutik imigassamik atuineq taamaallaat killilimmik alleriartartoq.

Peqataanik neriutigaarput siunnersuutip kinguneranik imigassamik aalakoornartortalimmik nioqquteqarneq siammarnerusinnaalerumaartoq, "Imigassarsiniarlutik tulleriiarlutik utaqqisartut" killeqartilugit, taamatullu aamma siunnersuutip kinguneranik naatsorsuutigineqarpoq anngiortumik imigassamik aalakoornartortalimmik nioqquteqartarnerit annikillisinneqarumaartut.

Taavalu aamma minnerunngitsumik siunnersuutip kinguneranik nunami innuttaasut kiffaangissuseqarnerulissapput pisiniarnissaminut, pisiniartalerlutik piffissami innuttaasut ataasiakkaat iluarinerpaasaanni.

Oqaatigeriikkatsitut siunnersuuteqarnermi siunertaavoq Inatsisartut tamarmiullutik 2012-mi aalajangingaanik piviusunngortitsiniarnissaq. Siunnersuuteqartulli aamma ammaffigaat nioqquteqarnerup suli sivilunerulersinneqarsinnaanissaa, niuertarfiit imigassanik aalakoornartortalinnik nioqquteqartartut ammanertik tamakkerlugu nioqquteqarsinnaangortillugit.

Siunnersuuteqartugut neriuutigaarput, partiit taamani aalajangiiffigisassatut siunnersuummut ilaliisut nuannaarutigiumaaraat, manna inatsisissatut siunnersuut saqqummiunneqartoq aqutugalugu kiisami Inatsisartut kissaataat piviusunngortinniarlugu alloriartoqarmat.

Taamatut oqaaseqarluta siunnersuuteqartugut kissaatigaarput eqiigasumik oqallittoqarumaartoq.